



MALAYSIA

Warta Kerajaan
SERI PADUKA BAGINDA
DITERBITKAN DENGAN KUASA

HIS MAJESTY'S GOVERNMENT GAZETTE
PUBLISHED BY AUTHORITY

Jil. 64
No. 6

18hb Mac 2020

TAMBAHAN No. 32
PERUNDANGAN (A)

P.U. (A) 91.

**AKTA PENCEGAHAN DAN PENGAWALAN PENYAKIT
BERJANGKIT 1988**

**PERATURAN-PERATURAN PENCEGAHAN DAN PENGAWALAN PENYAKIT BERJANGKIT
(LANGKAH-LANGKAH DI DALAM KAWASAN TEMPATAN JANGKITAN) 2020**

PADA menjalankan kuasa yang diberikan oleh subseksyen 11(2) Akta Pencegahan dan Pengawalan Penyakit Berjangkit 1988 [*Akta 342*], Menteri membuat peraturan-peraturan yang berikut:

Nama dan permulaan kuat kuasa

1. (1) Peraturan-peraturan ini bolehlah dinamakan **Peraturan-Peraturan Pencegahan dan Pengawalan Penyakit Berjangkit (Langkah-Langkah di dalam Kawasan Tempatan Jangkitan) 2020**.

(2) Peraturan-Peraturan ini berkuat kuasa bagi tempoh mulai 18 Mac 2020 hingga 31 Mac 2020.

Tafsiran

2. Dalam Peraturan-Peraturan ini—

“kawasan tempatan jangkitan” ertinya mana-mana kawasan yang diisytiharkan sebagai kawasan tempatan jangkitan di bawah Perintah Pencegahan dan Pengawalan Penyakit Berjangkit (Pengisytiharan Kawasan Tempatan Jangkitan) 2020 [*P. U. (A) 87/2020*];

“perkhidmatan perlu” ertinya perkhidmatan sebagaimana yang dinyatakan dalam Jadual.

Kawalan pergerakan dan perhimpunan

3. (1) Tiada seorang pun boleh bergerak dari satu tempat ke suatu tempat yang lain di dalam mana-mana kawasan tempatan jangkitan kecuali bagi maksud yang berikut:

- (a) untuk melaksanakan apa-apa tugas rasmi;
- (b) untuk bergerak ke atau dari mana-mana premis yang disebut dalam peraturan 5;
- (c) untuk membeli, membekalkan atau menghantar makanan atau keperluan harian;
- (d) untuk mendapatkan perkhidmatan jagaan kesihatan atau perubatan; atau
- (e) apa-apa maksud khas lain sebagaimana yang dibenarkan oleh Ketua Pengarah.

(2) Tiada seorang pun boleh berhimpun atau terlibat dalam mana-mana perhimpunan di dalam mana-mana kawasan tempatan jangkitan sama ada bagi maksud keagamaan, sukan, rekreasi, sosial atau kebudayaan.

(3) Walau apa pun subperaturan (2), seseorang boleh berhimpun atau terlibat dalam suatu perhimpunan bagi maksud upacara pengebumian dengan syarat bahawa bilangan orang yang hadir ke upacara itu berada pada tahap minimum.

(4) Tiada seorang pun boleh bergerak dari satu kawasan tempatan jangkitan ke suatu kawasan tempatan jangkitan yang lain kecuali dengan kebenaran bertulis pegawai polis yang menjaga balai polis terlebih dahulu.

Kehendak untuk menjalani pemeriksaan kesihatan apabila tiba di Malaysia

4. Seseorang warganegara atau pemastautin tetap Malaysia yang pulang dari luar negara hendaklah menjalani pemeriksaan kesihatan apabila tiba di Malaysia sebelum mendapatkan pelepasan imigresen di mana-mana pintu masuk dan hendaklah mematuhi apa-apa perintah yang dikeluarkan oleh pegawai diberi kuasa.

Perkhidmatan perlu

5. (1) Mana-mana premis yang menyediakan perkhidmatan perlu boleh dibuka dengan syarat bahawa bilangan kakitangan dan pengunjung di premis itu berada pada tahap minimum.

(2) Mana-mana premis yang tidak menyediakan perkhidmatan perlu boleh dibuka dengan syarat bahawa pemilik atau penghuni premis itu mendapatkan kebenaran bertulis Ketua Pengarah terlebih dahulu dan Ketua Pengarah boleh mengenakan apa-apa syarat yang difikirkannya patut.

(3) Mana-mana premis yang terlibat dalam rantaian pembekalan makanan atau dalam penjualan makanan dan minuman secara pandu lalu, bawa pulang dan penghantaran boleh dibuka tertakluk kepada apa-apa syarat yang boleh dikenakan oleh Ketua Pengarah sebagaimana yang difikirkannya patut.

Permintaan maklumat

6. Jika seorang pegawai diberi kuasa meminta apa-apa maklumat yang berhubungan dengan pencegahan dan pengawalan penyakit berjangkit daripada mana-mana orang, orang itu hendaklah mematuhi permintaan itu.

Kesalahan

7. (1) Mana-mana orang yang melanggar mana-mana peruntukan Peraturan-Peraturan ini melakukan suatu kesalahan dan hendaklah, apabila disabitkan, didenda tidak melebihi satu ribu ringgit atau dipenjarakan selama tempoh tidak melebihi enam bulan atau kedua-duanya.

(2) Jika suatu kesalahan dilakukan oleh suatu pertubuhan perbadanan, mana-mana orang yang, pada masa berlakunya kesalahan itu ialah seorang pengarah, pengurus, setiausaha atau pegawai serupa itu yang lain pertubuhan perbadanan itu atau yang berupa sebagai bertindak dalam apa-apa kapasiti atau yang mengikut apa-apa cara atau apa-apa takat bertanggungjawab bagi pengurusan hal ehwal pertubuhan perbadanan itu atau telah membantu dalam pengurusan itu—

- (a) boleh dipertuduh secara berasingan atau bersesama dalam prosiding yang sama dengan pertubuhan perbadanan itu; dan
- (b) jika pertubuhan perbadanan itu didapati bersalah melakukan kesalahan itu, hendaklah disifatkan bersalah atas kesalahan itu melainkan jika, dengan mengambil kira sifat fungsinya dalam kapasiti itu dan segala hal keadaan, dia membuktikan—
 - (i) bahawa kesalahan itu dilakukan tanpa pengetahuan, persetujuan atau pembiarannya; dan
 - (ii) bahawa dia telah mengambil segala langkah berjaga-jaga yang munasabah dan telah melakukan usaha yang sewajarnya bagi mencegah berlakunya kesalahan itu.

JADUAL
PERKHIDMATAN PERLU
[Peraturan 2]

1. Perbankan dan kewangan
2. Elektrik dan tenaga
3. Bomba